

Wednesday, November 12, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

DAMPA BY POLL

Dampa Assembly bial By-Election vote thlak chu boruak muanawm tak hnuaiah nimin khan zawhfel a ni a, vote tla hi za zela 83.07% a ni.

Dampa bial by election Returning Officer Pu Malsawmzuala hnen atanga thudawn danin Dampa bial chhung polling station 41 ah te tluang takin mipui ten vote an thlak a, ruahman lawk angin polling station 39 ah te chuan tlai dar li khan mipui ten vote an thlak fel thei a, Silsuri 1 leh Marpara North polling station ah te tlai dar 4 hnuaah vote thlak zui a ni a, Marpara North hi dar 8:20 vel ah vote an thlak zo thei ni a thudawn a ni.

Akashvani News Aizawl chuan nimin khan Dampa Bial MLA inthlana vote thlakna hmun hrang hrang a tlawhkual a, harsatna leh buaina liantham awm loin tluang takin vote an thlak a; tun by election ah hian a tum khat nana vote thlak te pawh engemawzat an hmu a ni.

Kan corr sawi danin tun Dampa by election hi political party tin tan a pawimawh hle a, by election result hian political party tin tan kum 2028 MLA Inthlanpuia an dinhmun tur ah nghawng lian tak a nei dawn ni a ngaih a ni.

Dampa bial huam chhungah hian Voters mipa 10637, hmeichhia 10231 an vaiin mi 20888 an awm a, heta tanga vote tla zat hi Mipa 8921 leh hmeichhia 8430, an vaiin mi 17351 niin hei hi 83.07% a ni a. Hetah hian Postal Ballot hmanga vote tla chhiar tel a la nilo a ni.

Puan tawh angin Dampa bial By- Election kalpui mekah hian Polling Station 41 awmin Polling station 40-ah hian webcasting kalpui niin Zopui Polling station-ah erawh kawlphehtha a luh loh avangin kalpui ve theih a nilo a ni. Dampa Constituency chhungah hian Critical Polling station Silsury I,II, III te an ni a. Dampa-ah hian vote awm zawng zawng zat hi 20888 a ni.



LADC

December ni 3-a Lai Autonomous District Council inthlan lo awm turah vawiin khan ZPM leh MNF chuan candidate tur an puang.

ZPM Party President Pu Lalliansawta chuan vawiin khan an party pisa ah LADC MDC bial 25-a ding tur ZPM candidate mi 25 puangin candidate thlang tur hian a hmuna awm atangin mi 8 awmna Search Committee an din a, kum tir atangin candidate atana tha tur uluk taka zirin ngaihtuahna an lo seng tawh a ti a. ZPM General Headquarters chuan Nomination Committee dinin tum 5 an thu a, uluk taka

an ngaihtuah hnuah secret ballot hmangin candidate tur an thlang chhuak ta a ti a. LADC-a bial 25-ah hian din tum leh inbeisei mi 116 zet an awm tih sawiin Lai mipuite leh ZPM tan tang tlang a, theih tawp chhuah zel turin a sawm a, state sorkar tha taka thawhpui thei tur leh LADC nghet tha tak din turin an beisei tih a sawi bawk a ni.

Byte : ZPM Gen.Hqrs President Pu Lalliansawta

MNF Party President Pu Zoramthanga pawhin vawiin khan LADC MDC inthlan lo awm tura MNF candidate mi 25 tur puangin MNF Party Nomination Committee in MNF Party Official Candidate tur chu an ruat a ti a, LADC mipuiten an candidate chu thlawp ngei turin a sawm a ni.



CYMA

YMA rorelna sang, Central Co-Ordination Committee (CCC) meeting vawi 104-na chu vawiin khan Central YMA Hall, Tuikhuahtlangah neih a ni.

CCC Meeting hi chawhma dar 10 leh a chanve atanga neih tan niin, Central YMA President Pu R. Langheta'n a kaihruai a, report ngaihthlak niin, Sakawrdaia YMA Inkhawmpui Lian Vawi 75-na neih zawh tak thlirletna hun hman a nih bakah YMA inkhawmpui lian rorel bawhzui chungchang te, YMA khawih, sawrkar khawih leh a tul dangte ngaihtuah nghal a ni. He hunah hian Central YMA hrulaitute bakaha Sub-Headquarters, Group leh Aizawl khawpui chung Branch aiawhte an tel a ni.



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahtial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawk ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.



PUBLIC SERVICE BROADCASTING DAY

Vawiin hi Public Service Broadcasting Day a ni a, he ni hi kumtin November ni 12 ah Radio kaltang a hman thin a ni. India Hnam Pa Mahatma Gandhi a'n kum 1947 a New Delhi a Broadcasting House a tlawh hmasak ber leh a tlawh chhun hriatreng nana hman thin a ni a, he ni ah hian Pu Gandhi-a thusawi ropui tak tak te radio kaltlang a puan chhuah thin a ni.

